

Tico Croes ta papia di Promer Ministro Oduber, Coastal y Irak

Posicion dudoso di Promer Ministro ta haci daño

Promer Ministro ta sigui defende Coastal enbez di defende Aruba

ORANJESTAD(AAN)--

"Ministro Presidente atrobe ta haci un intento pa hustifica e eventual negociacion di Coastal y Irak di venta di refineria. Atrobe Ministro Presidente no ta sali na defensa di interes di Aruba, pero ta parece un ehecutivo di Coastal, defendiendo interes di e multinacional aki." Esaki ta loke a sali dilanti den un declaracion di Tico Croes di AVP.

E Miembro di Parlamento a muestra cu no por permiti ningun compania, kende cu e por ta, pa na e momentonan aki tin relacion cu Irak. No solamente esaki ta viola e posicion di Nacionnan Uni, cu tin un embar-

go economico contra Irak, pero na mes momento un relacion cu Irak ta perhudica e interes di Aruba.

Segun Tico Croes, e posicion di Aruba mester ta firme y no

mester tin ningun duda na ki banda Aruba ta para den e eventual guerra aki. Aruba su posicion ta cu mundo contra Irak. Y ta pesey AVP ta lamenta cu a penas cinco dia promer cu un eventual guerra, Ministro Presidente a crea duda den e postura firme cu Aruba mester tuma den e asunto aki.

Na opinion di Tico Croes, Ministro Presidente mester a comunica na Oscar Wyatt cu Gobierno di Aruba lo no acepta

ningun tipo di negociacion di Coastal cu Irak tocante e refineria na Aruba. Trata di defende Coastal, lubidando interes di Aruba; purba ridiculiza oposicion pa motibo cu nan a expresa nan opinion fuerte atrobe, segun Tico Croes ta un indicacion cu Ministro Presidente no ta comprende su rol ni tampoco ta comprende e seriedad di henter e asunto aki.

E no a spera otro di Ministro Presidente tampoco, mirando e expresaionnan cu el a haci caba den pasado cu mundo no ta cumenza na Hulanda ni caba na Merca. Tico Croes ta puntra si acaso pa Ministro Presidente mundo ta cumenza na Irak of ta caba na Irak.